

Grischun 2022 generescha investiziuns da 1,5 milliardas

Emprima stimaziun dals custs per ils Gieus olimpics d'enviern en Svizra

■ (cp) L'Uniu Grischun 2022 ha fatg in'emprima stimaziun dals custs per l'execuziun da gieus olimpics d'enviern en Svizra. Ella fa quint cun custs totals da 2,8 milliardas francs. Cun entradas dad 1,5 milliardas francs ston ins per il mument calcular cun expensas betg cuvridas dad 1,3 milliardas. Gieus olimpics generessan investiziuns dad ina milliarda e mez: quels daners vegnissan investids surtut en l'infrastructura per il traffic – prioritarmain en il traffic public – ed en edifizis per il turissem ed il sport. Ins ha era fatg in preventiv per ils custs da candidatura: quel importa 60 milliuns francs. L'uniun beneventa la decisiun dal cussegl federal da laschar elavurar in mesadi da candidatura per mauns dal parlament federal.

La candidatura per l'olimpiada «Grischun 2022» survegn uss er emprimas conturas finanzialas. Sco part da l'examinaziun da la factibilitad han ins fatg in'expertisa finanziaria per eruir ils custs d'execuziun da gieus olimpics d'enviern en Svizra. Quella quinta cun custs operativs da 2,84 milliardas francs. Tar entradas calculadas dad 1,51 milliardas francs exista per il mument in deficit dad 1,33 milliardas francs. Davart la finanziaziun da quel deficit han la confederaziun ed il chantun Grischun gia discurrì in cun l'auter.

Las cifras actualmain avant maun correspundan ad in scenari precaut, ma realistic: Sin basa dals resultats da l'emprima examinaziun da factibilitad han ins calculà post per post ils custs per edifizis temporars e per la gestiun ed execuziun da l'occurrentza e stimà las investiziuns necessarias. Cun la finamira d'augmentar la persistenza vegn il concept ussa sviluppà vinavant.



Gian Gilli preschenta il sujet per l'olimpiada «Grischun 2022».

FOTO Y. BÜRKL

Persistenza e controlla dals custs

«Nossas calculaziuns dals custs actualas sa basan sin l'emprima examinaziun da la factibilitad. Uss ans stentain nus d'optimar ils concepts e da reducir uschia er ils custs», declera Gian Gilli, il director da l'Uniu Grischun 2022. «Ils edifizis tem-

porars per lieus da sport e vitgs olimpics cumpiglian anc ina gronda part da noss concept. Nus tschertgain uss intensivamain soluziuns per render ils concepts anc pli persistents, senza perder la controlla dals custs. Uschia entschavaiva gia oz a Tavau il dialog d'innovaziun en vista al svi-

lup d'in vitg olimpic che pudess vegnir mantegnì suenter il 2022. Quai na dischargiass betg mo noss budget, mabain garantiss oravant tut er a Tavau in gudogn supplementar e persistent.»

La stimaziun dals custs per l'execuziun da gieus olimpics en Svizra è vegnida fatga dals spezialists da l'uniun ensemen cun experts da finanzas da PricewaterhouseCoopers (PwC) ch'ha ina gronda experientscha internaziunala sin il champ da la calculaziun da gieus olimpics e d'autras occurrenzas grondas. La stimaziun è alura vegnida giuditgada e confermada dad in'autra societad da revisiun internaziunala en il rom d'ina segunda expertisa.

1,5 mia. investiziuns en infrastructura per il traffic ed il turissem

La realisaziun dals Gieus olimpics en il Grischun vegn a generar investiziuns d'infrastructura da privats e dal maun public da radund 1,5 milliardas francs. Quellas investiziuns n'èn betg cuntengidas en il budget dals organisaturs. Dus terz da quels daners vegnan duvrads per implants da traffic (viafier, vias) e per material rudlant; ils Gieus olimpics d'enviern na fissan dentant betg il motiv, mabain mo il catalisatur da las investiziuns. Ils implants ed acquisti vegnan per gronda part gia planisads a lung termin tras il maun public, las investiziuns vegnissan però anticipadas per ils gieus olimpics.

Ils edifizis per l'alloschament dals giasts ed ils implants da sport fan l'auter terz da las investiziuns. Tut las investiziuns previsas duain servir a lunga vista a la regiun d'occurrentza sco spazi da viver, d'economia e da recreaziun. Implants che na pudessan betg vegnir utilisads suenter il 2022 u alura mo cun custs irresponsabls, vegnan consequenta-

main evitads ed erigids mo per ils gieus olimpics.

Deliberà il budget da candidatura

En il rom da l'examinaziun da factibilitad è ussa vegnids calculads exactamain er ils custs da la candidatura per l'olimpiada: La suprastanza da l'Uniu Grischun 2022 ha deliberà in budget da candidatura da 60 milliuns francs. Quel vegn impundì per la projectaziun da gieus olimpics d'enviern, per la candidatura senza sco era per la communicaziun en Svizra e visavi ils responsabls internaziunals da l'IOC.

Tenor ina calculaziun approximativa quintav'ins fin qua cun 36 milliuns francs. Quella calculaziun è vegnida fatga il 2011 e sa basa sin cifras publicadas dad autras candidaturas, da las qualas ins na po però betg dir precis sch'i sa tracta da quintes dals custs cumplains u betg. Ils 60 milliuns francs deliberads ussa per ina candidatura svizra è percenter ina calculaziun dals custs cumplains.

«Il budget da 60 milliuns è ina basa solida per l'elavuraziun d'in dossier da candidatura competitiv e per la communicaziun fundada da nossa proposta innovativa da 'gieus alvs sco la naiv' en las Alps», declera Gian Gilli. «El è vegnì stabilì project per project en il rom da las examinaziuns da factibilitad ed è alura vegnì analisà criticamain e verificà da spezialists externs independents.»

Dumondas da finanziaziun

Per la finanziaziun da la candidatura ed ina realisaziun dals gieus olimpics vegnan ussa tschertgadas soluziuns supportabls per tuts ils partenaris. La confederaziun, il chantun Grischun, ils lieus d'occurrentza San Murezzan e Tavau ed il sport entran per quel intent uss en tractativas.